



Republika e Kosovës
Republika Kosovo - Republic of Kosovo
Kuvendi - Skupština - Assembly

Ligji Nr.08/L-248

**PËR NDRYSHIMIN DHE PLOTËSIMIN E LIGJIT NR. 04/L-131 PËR
SKEMAT PENSIONALE TË FINANCUARA NGA SHETI**

Kuvendi i Republikës së Kosovës:

Në mbështetje të nenit 65 (1) të Kushtetutës së Republikës së Kosovës,

Miraton:

**LIGJ PËR NDRYSHIMIN DHE PLOTËSIMIN E LIGJIT NR. 04/L-131 PËR
SKEMAT PENSIONALE TË FINANCUARA NGA SHETI**

Neni 1
Qëllimi

Qëllimi i këtij ligji është ndryshimi dhe plotësimi i Ligjit Nr. 04/L-131 për Skemat Pensionale të Financuara nga Shteti (në tekstin e mëtejme: Ligji Bazik).

Neni 2

Plotësohet neni 3 i Ligjit Bazik, ashtu që pas nën-paragrafit 1.13 të paragrafit 1, shtohet nën-paragrafi 1.14 me tekstin si në vijim:

1.14. **Rezident** – nënkupton praninë fizike në Republikën e Kosovës mbi njëqind e tetëdhjetë e tre (183) ditë në çdo periudhë kohore dymbëdhjetë (12) mujore.

Neni 3

Fshihet paragrafi 2 dhe paragrafi 6 i nenit 8 të Ligjit Bazik.

Neni 4

Pas nenit 8, shtohet dispozita ligjore 8/A në Ligjin Bazik me tekstin si në vijim:

Neni 8/A

Pensioni parcial kontributpagues i moshës

1. Personat që kanë kontribuar sipas Ligjit për Sigurimin Pensional dhe Invalidor Nr. 011-24/83 (Gazeta Zyrtare e KSAK Nr. 26/83) para datës 01.01.1999 por nuk e arrijnë stazhin pensional prej pesëmbëdhjetë (15) vitesh kontribute si periudhë kushtëzuese për shkak se janë larguar nga puna si rezultat i masave të dhunshme, mund të kualifikohen në skemën e pensionit parcial kontributpagues të moshës sipas kriterëve dhe kushteve të përcaktuara në këtë nen.
2. Të drejtën në pension parcial kontributpagues të moshës e realizojnë të gjithë personat të cilët kanë shtetësi të Kosovës dhe të cilët plotësojnë kushtet në vijim:
 - 2.1. kanë mbushur moshën gjashtëdhjetë e pesë (65) vjeçare;
 - 2.2. ofrojnë dëshmi të vlefshme mbi pagesën e kontributeve sipas dispozitave të Ligjit për Sigurimin Pensional dhe Invalidor nr.011-24/83 (Gazeta Zyrtare e KSAK nr.26/83) para datës 01.01.1999;
 - 2.3. janë larguar nga puna pas datës 01.01.1989 si rezultat i masave të dhunshme;
 - 2.4. shuma e periudhës së kontributeve të paguara sipas nën-paragrafit 2.2 si dhe periudhës nga data e largimit të dhunshëm nga puna sipas nën-paragrafit 2.3 e deri më 01.01.1999 bashkërisht arrijnë nivelin prej pesëmbëdhjetë (15) vitesh.
3. Dokumentacioni i nevojshëm për të plotësuar kushtet e paragrafit 2 të këtij neni përcaktohet me akt nënligjor nga ministri.
4. Lartësia e pensionit parcial kontributpagues për secilin nivel përcaktohet në përputhje me procedurën e vendosur me nenin 13 të Ligjit Bazik, duke marrë për bazë numrin e viteve të kontributeve të paguara sipas nën-paragrafit 2.2 të këtij neni.

Neni 5

Plotësohet neni 21 i Ligjit Bazik ashtu që pas paragrafit 2, shtohet paragraf i ri me tekstin si në vijim:

3. Pagesa e pensioneve sipas këtij ligji ndërpritet nëse pensionisti nuk është rezident në Republikën e Kosovës. Për zbatimin e mëtejme të kësaj dispozite, ministria përgjegjëse mund të nxjerr akt nën-ligjor.

Neni 6

Shfuqizimi i dispozitave ligjore

1. Me këtë ligj shfuqizohet nën paragrafi 7, të nën paragrafit 3, të paragrafit 2 të nenit 6 të Udhëzimit Administrativ (MPMS) Nr. 09/2015 për Kategorizimin e Shfrytëzuesve të Pensionit Kontributpagues sipas Strukturës Kualifikuese dhe Kohëzgjatjes së Pagesës së Kontributeve – Stazhit Pensional, si dhe çdo dispozitë tjetër ligjore që bie ndesh me këtë ligj.

2. Pjesa e mbetur e Udhëzimit Administrativ (MPMS) Nr. 09/2015 për Kategorizimin e Shfrytëzuesve të Pensionit Kontributpagues sipas Strukturës Kualifikuese dhe Kohëzgjatjes së Pagesës së Kontributeve – Stazhit Pensional vazhdon të zbatohet gjerë në masën që nuk bie ndesh me këtë ligj dhe/ose derisa nuk shfuqizohet me ndonjë akt tjetër nënligjor.

Neni 7

Njohja e stazhit pensional me ligje të posaçme

1. Ligjet e posaçme që rregullojnë njohjen e stazhit pensional gjerë në vitin 1999 sikurse neni 1 i Ligjit Nr. 06/L-073 për Statusin e Punëtorëve të Arsimit Shqip të Republikës së Kosovës nga Viti Shkollor 1990/91 deri në Vitin Shkollor 1998/1999 nuk zbatohen në raport me Ligjin Bazik ose me këtë ligj për qëllime të llogaritjes së stazhit pensional.

2. Stazhi pensional për llogaritjet vetëm sipas kriterëve të vendosura me Ligjin Bazik dhe këtë ligj.

Neni 8

Kompensimi tranzitor i reduktimit të lartësisë së pensionit

1. Në rastet kur pensionistët kalojnë nga skema e pensionit kontributpagues të moshës në skemën parciale të pensionit kontributpagues të moshës si rezultat i hyrjes në fuqi të këtij ligji, dhe pësojnë reduktim të lartësisë së pensionit, kompensohen në format tranzitor si në vijim:

1.1. Deri më 31.12.2023, pensionisti kompensohet me njëqind për qind (100%) të diferencës ndërmjet pensionit të fundit të realizuar me Ligjin Bazik, dhe realizimit të pensionit sipas kriterëve me këtë ligj;

1.2. Deri më 31.12.2024, pensionisti kompensohet me shtatëdhjetë e pesë për qind (75%) të diferencës ndërmjet pensionit të fundit të realizuar me Ligjin Bazik, dhe realizimit të pensionit sipas kriterëve me këtë ligj;

1.3. Deri më 31.12.2025, pensionisti kompensohet me pesëdhjetë për qind (50%) të diferencës ndërmjet pensionit të fundit të realizuar me Ligjin Bazik, dhe realizimit të pensionit sipas kriterëve të këtij ligji.

2. Ky kompensim tranzitor nuk aplikohet për personat që fillojnë marrjen e pensionit pas datës 15.07.2023.

Neni 9 **Hyrja në fuqi**

Ky ligj hyn në fuqi në ditën e publikimit në Gazetën Zyrtare të Republikës së Kosovës.

Ligji Nr. 08/L-248
27 korrik 2023

Glauk KONJUFCA

Kryetar i Kuvendit të Republikës së Kosovës